

三經同卷

佛說彌勒來時經

佛說彌勒下生成佛經

觀彌勒菩薩下生經

貞六

佛說彌勒來時經

失譯師名開元錄附東晉第四譯

舍利弗者是佛第一弟子以慈心念天下往
到佛所前長跪叉手問言佛常言佛去後當
有彌勒來願欲從佛聞之佛言彌勒佛欲來

出時閻浮利內地山樹草木皆焦盡於今閻
浮利地周匝六十萬里彌勒出時閻浮利地
東西長四十萬里南北廣三十二萬里地皆
當生五種果蓏四海內無山陵溪谷地平如
掌樹木皆長大當是時人民少貪婬瞋恚愚
癡者人民眾多聚落家居鷄鳴展轉相聞人
民皆壽八萬四千歲女人五百歲乃行嫁人
民無病痛者都盧天下人有三病一者意欲
有所得二者飢渴三者年老人民面目皆桃
華色人民皆敬重有城名雞頭末雞頭末城

者當王國治城周匝四百八十里以上築城復以板著城復以金銀瑠璃水精珍寶著城四面各十二門門皆刻鏤復以金銀瑠璃水精珍寶著之國王名僧羅四海內皆屬僧羅行即飛行所可行處人民鬼神皆傾側城有四寶一者金有龍守之龍名倪搔鋒主護金龍所止地名捷陀二者銀其國中復有守龍名播頭三者明月珠所生地處名須漸守珍龍名賓竭四者瑠璃所生城名汜羅那夷有一婆羅門名須凡當爲彌勒作父彌勒母名

摩訶越題彌勒當爲作子彌勒者種當作婆羅門身有三十二相八十種好身長十六丈彌勒生墮城地目徹視萬里內頭中日照四千里彌勒得道爲佛時於龍華樹下坐樹高四十里廣亦四十里彌勒得佛時有八萬四千婆羅門皆往到彌勒所師事之則棄家作沙門彌勒到樹下坐用四月八日明星出時得佛道國王僧羅聞彌勒得佛則將八十四王皆棄國捐王以國付太子共到彌勒佛所皆除鬚髮爲沙門復有千八百婆羅門皆

到彌勒佛所作沙門彌勒父母亦在其中復有聖婆羅門千八十四人皆復到彌勒佛所作沙門國有大豪賢者名須檀人呼須達復呼人民以黃金持與彌勒佛及諸沙門名聲日布方遠須達復將賢善人萬四千人到彌勒佛所作沙門復有兄弟二人兄名鼓達弟名扶蘭兄弟皆言我曹何爲住是世間寧可俱到佛所求作沙門耶兄弟皆言我善便到彌勒佛所作沙門復有小女人輩八萬四千人身皆著好衣白珠金銀瓔珞俱到彌勒佛

所皆脫著身珍寶以著地白佛言我曹欲持是上佛及諸沙門我欲從佛作比丘尼佛即令作比丘尼彌勒佛坐爲諸比丘僧比丘尼皆無不是釋迦文佛時誦經者慈心者布施者不瞋恚者作佛圖寺者持佛骨著塔中者頁六燒香者然燈者懸繒者散華者讀經者是諸比丘尼皆釋迦文佛時人持戒者至誠者於今皆來會是聞諸比丘所說經處處者皆於龍華樹下得道彌勒佛初一會說經時有九十六億人皆得阿羅漢道第二會說經時有

九十四億比丘皆得阿羅漢第三會說經九

十二億沙門皆得阿羅漢舉天上諸天皆當

持華散彌勒身上彌勒佛當將諸阿羅漢至

雞頭末王所治城王皆內宮中飯食舉城皆

明夜時如晝日彌勒於宮中坐說經言善不

可不作道不可不學經不可不讀佛說經已

諸比丘及王百官皆當奉行佛經戒皆得度

世佛說如是彌勒佛却後六十億殘六十萬

歲當來下

佛說彌勒來時經

佛說彌勒下生成佛經

唐武周三藏法師義淨奉制譯

如是我聞一時薄伽梵在王舍城鷲峯山上
與大苾芻菩薩衆俱爾時大智舍利子法將
中最哀愍世間從座而起偏袒右肩右膝著
地合掌恭敬而白佛言世尊我今欲少諮問
願垂聽許佛告舍利子隨汝所問我當爲說
時舍利子即以伽他請世尊曰

大師所授記 當來佛下生 彼號爲慈氏
如前後經說 唯願人中尊 伽他重分別